

四庫全書

集部

欽定四庫全書

集部

東漢文紀卷二十二

詳校官庶吉士臣陳若霖

主事銜臣徐以坤覆勘

總校官進士臣楊懋珩

校對官中書臣孫球

謄錄監生臣華春芳

欽定四庫全書

東漢文紀卷二十二

明 梅鼎祚 編

蔡邕四

太尉汝南李公碑

公諱咸字元卓汝南西平人蓋秦將李信之後孝武大將軍廣之胄也枝流葉布家于茲土文武繼踵世為著姓曾祖父江夏太守伯父東郡太守公受純懿之資萃忠清之節夙夜嚴慄孝配大舜敦詩書而說禮樂觀天

文而察地理動與神合契抗流行操邁伯夷德追孔父
舉孝廉除郎中光祿茂才遷衛國公相受高密令勤恤
民隱政成公簡遷徐州刺史百司震肅饗饗風靡惡直
醜正恭事法官帝念其勤屢被榮命漁陽太守還遷度
遼將軍協德魏絳和我綏邊徵河南尹母憂乞行服闋
奔命孝和皇帝時機密久缺百僚僉允詔拜尚書歷僕
射令納言危行不絀以公事去民神憤怒羣公薦之帝
曰俞哉徵拜將作大匠大司農大鴻臚大僕射公所蒞

任憲天心以教育激垢濁以揚清懿鑠之美昭登于上
丕顯之化宣聞于下及遷台司位太尉補袞闕叙彝倫
天人交格終始無疵雖元凱翼虞周召輔姬未之或踰
功遂身退以疾自遜求歸田里告老致仕七十有六嘉平
四年薨海內咨嗟莫不惻焉故吏潁川太守張溫等相
與嘆曰名莫隆于不朽德莫盛于萬世銘勒顯于鐘鼎
清烈光于來裔刻石立碑德載不泯詞曰

天垂三台地建五岳降生我哲應鼎之足奕世載德名

昭圖錄既文且武桓桓紹續外則折衝內則大麓惟清
惟敏品物以熙告老懸車天人靡欺曾不百齡圯我國
基人之云亡八極悼思申德作頌光寵宣流鐫紀斯石
鴻烈顯休

朱公叔墳前石碑

維漢二十一世延熹六年粵四月丁巳忠文公益州太
守朱君名穆字公叔卒于京師其五月內申葬于宛邑
北萬歲亭之陽舊兆域之南其孤野受顧命曰古者不

崇墳不封墓祭服雖三年無不于寢今則易之吾不取也爾其無拘于俗無廢予誠野欽率遺意不敢有違封墳三板不起棟宇乃作祠堂于邑中南舊陽里備器鑄鼎銘功載德懼墳封彌久夷于平壤于是依德像緣雅則設茲方石鎮表靈域用慰其孤罔極之懷乃申詞曰歆惟忠文時惟朱父實天生德丕承洪緒彌綸典術允迪聖矩好是貞厲疾彼強禦斷剛若仇柔亦不如仍用明夷邁難受侮帝曰休哉朕嘉乃功命汝納言脩汝祖

蹤父拜稽首翼翼惟恭篤棊不忘夙夜在公昊天不弔
降茲殘殃不遺一父俾屏我皇我皇悼心錫詔孔傷位
以益州贈之服章用刊彝器宣昭遺光子子孫孫永載
寶藏

陳留太守胡公碑

君諱碩字季獻交趾都尉之孫太傅安鄉侯少子也其
先與楚同姓別封于胡以國為氏臻乎漢奕世載德不
替舊勲君幼有嘉表克岐克嶷不見異物習與性成孝

於二親養色寧意蒸蒸雍雍雖曾閔顏萊無以尚也總
角入學治孟氏易歐陽尚書韓氏詩博綜古文周覽篇
籍言語造次必以經綸加之行已忠儉事施順恕公體
所安與衆共之驕吝不萌于內喜愠不形於外可謂無
競伊人溫恭淑慎者也初以公在司徒除郎中宿衛十
年遭叔父憂以疾自免州郡交辟皆不就後以大將軍
高第拜侍御史遷諫議大夫以將軍事免官舉賢良方
正不詣公車建寧元年召拜議郎納忠盡規匪懈于位

遷侍中虎賁中郎將是年遭疾屢上印綬詔書聽許以
侍中養疾其年七月被尚書召不任應命詔使謁者劉
惺齋印綬即拜陳留太守君聞使者至加朝服拖紳使
者致詔君以手自繫陳辭謝恩其明二十一日遣吏奉
章報謝意氣精朗是日疾大漸刻漏未分奄忽而卒時
年四十一天子憫悼詔使者王謙送葬以中牢具祠賜
錢五萬布百疋贈穀三千斛同位畢至赴弔雲集生榮
未艾沒有餘哀于是遐邇播紳爰暨門人相與嘆述君

德追痛不寘恒切情僚無不永懷行由已作名自人成
先民既邁賴茲頌聲嗟我明哲如何勿銘乃作辭曰
猗歟懿德令聞有彰祇服其訓克構克堂孝思惟則文
藝丕光敦厚忠恕衆悅其良綏弱以仁不云我強爰自
登朝進退以方見幾而作如鴻之翔乃位常伯恪處左
右兼掌虎賁禁戎允理邁茲虐疴帝用悼止俾守陳留
庶篤其祉王人既詔景命不俟嗚呼昊天殲我英士如
何贖也命不自己哀哉永傷萬年是紀

太守胡公碑銘

君諱碩字季叡交趾都尉之孫太傅安樂侯之子也順
帝時為郎中桓帝時遭叔父憂以疾自免荊州將軍每
辟輒辭疾後以高等拜侍御史遷諫議大夫舉賢良方
正病不詣公車建寧元年七月拜陳留太守病加不任
應召詔使謁者劉惔即授印綬二十一日卒詔遣使者
王謙以中牢具祠特賜錢五萬布一百疋贈穀三千斛
儔類赴送遠近鱗集于時陳留主簿高吉蔡軫等咸以

郡選充備官屬來迎者三十四人奔驚跋涉願承清化
逢天之戚不獲延祚痛心絕望切怛永慕乃相與哀經
庭位號咷靈柩將窆申敷修儀疚在輿服寮御部引各
執其職路人感愴觀者嘆息遂樹碑作銘以表令德
於藐下國瞻仰俊乂欽見我君爰綏我惠式昭績恩有
勞其瘁昊天不弔景命顛墜悠悠蒸黎惆悵喪氣政雖
未宣古之遺愛祁祁我君習習冠蓋修誠以迓曾不東
邁靈魂徘徊靡所瞻逮惟其傷矣胸肝摧碎勒銘告哀

傳千萬代

琅琊王傳蔡公碑

君諱朗字仲明蓋倉頡之精胤姬稷之末胄也昔叔度
文王之昭建侯于蔡以國氏焉迄于平襄周祚微缺王
室遂卑齊晉交爭強楚侵陵昭侯徙于州來公族分遷
氏家于圉奕葉載德常歷官尹以逮于茲君雅操明允
威厲不猛履孝悌之性懷文藝之才包洞典籍刊摘沉
秘知幾達要通含神契既討三五之術又采二南之業

以魯詩教授生徒雲集莫不自遠並至栖遲不易其志
簞食曲肱不改其樂心棲清虛之域行在玉石之間是
以德行儒林智周當代四岳稱名帝曰予聞元和元年
徵拜博士舒演與秘贊理關文所立卓爾度躡雲蹤其
選士也抑頑錯枉進聖擢偉極遺逸于九臯揚明德于
側陋拔茅以彙幽滯用濟加以清敏廣平好是正直規
誨之策日諫王庭忠諫著烈令聞流行聖朝以藩國貴
胄先帝遺體或以繼絕襲位正于阿保未洽雅訓驕盈

僭差或蹈憲理非弘直碩儒莫能匡弼蔡君雷行修德
進退可度遷河間中尉琅琊王傳乃從經術之方示以
裴謨之威率禮莫違其國用靖雖安國之輔梁孝仲舒
之相江都靡以加焉勲績既盛帝簡其功將授上位遷
于紫宮賦壽不永邁此疾凶年五十八永興六年夏卒
嗚呼哀哉

凡百君子咨痛罔極殷懷傷悼含涕流惻如何昊天喪
我師則爰勒斯銘式昭其德天敏明哲於赫我君含弘

光大玄覽孔真潛樂教思韞玉衡門雲龍感應養徒三千珠藏外耀鶴鳴聞天若時徵庸登祚王臣綜彼前疑定此典文叅佐七德俾相大藩身沒稱顯永遺令勲表行揚名垂示後昆

汝南周巨勝碑

君諱懿字巨勝陳留太守之孫光祿勲之子也君應坤乾之淳靈繼命世之期運玄懿清朗貞厲精粹體仁足以長人嘉德足以合禮總六經之要括河洛之機援天

心以立鈞贊幽明以揆時沉靜微密淪于無內寬裕弘博含乎無外巨細洪纖罔不總也是以實繁于華德盈乎譽初以父任拜郎中疾去官察孝廉是時郡守梁氏外戚貴寵非其好也遂以病辭太守復察孝廉乃俯而就之以明可否然猶私存衡門講誨之樂不屑已也又委之而旋故大將軍梁冀專國作威海內從風世之雄材優逸之徒莫不委質從命而顛覆者蓋亦多矣聞君洪名前後三辟卒不降身由是搢紳歸高羣公事德太

尉司徒再辟三辟察賢良方正州舉孝廉皆病不就擾攘之際災青仍發聖上詢詔師錫策命公車特徵君仰瞻天象俯察人事世路多險進非其時乃托疾杜門靜居里巷無人跡外庭生蓬蒿如此者十餘年強禦不能奪其守王爵不能滑其慮至延熹二年乃更闢門延賓享宴娛樂及秋而梁氏誅滅十二月君卒然則識幾知命可觀于斯矣洋洋乎若德雖崇山千仞重淵百尺未足以喻其高究其深也夫三精垂耀處者有表爰在上

世作者七人焉有該百行備九德齊光日月洞靈神明
如君之至者與亶所謂天明之秀也享年五十不登期
考遐邇歎悼痛心矢圖乃相與建碑勒銘以旌休美其
辭曰

厥初生民天賜之性有龐有醇有否有聖伊惟周君允
卜其政誕茲明德自貽哲命煥乎其文如星之布確乎
不拔如山之固追踪先緒應期作度潛心大猷覃思德
謨遁世無悶屢辭王寮洋洋泌丘予以道遙蔑爾童蒙

是訓是教瞻彼榮寵譬諸雲霄優哉游哉侔此弘高名
振華夏光耀昆苗清風丕揚德音孔昭

彭城姜伯淮碑

宋歐靜識之序蔡中郎集云姜伯淮碑稱建安二年而邕前死

初平三年為可疑此案文姜服靈帝熹平二年卒此建安二字傳訛耳邕後肱死十數年

尚是邕文

先生諱肱字伯淮彭城廣人也其先出自帝胄在皇唐
蓋與四岳共業能禮于神舜命秩宗爰封于呂其裔呂
望佐周克殷俾侯齊國姓有姜氏即其後也高祖祖父

皆豫章太守穎陰令先生既蹈先世之純德體英妙之高
姿立性純固百行修備故其平生所能事親惟孝如
大舜五十而慕友于兄弟有棠棣之華萼華之度體惠
理和有上德之素安靜守約恩及嬰兒至操動信邑中
化之外戶不閉治藏無隱及其學而知之者三墳五典
八索九丘俯仰占候推步陰陽有名物定事之能獨見
先覩之效然猶學而不厭誨人不倦童冠自遠方而集
者蓋千餘人夫水盈而流德交而形是故德行外著洪

聲遠布華夏同稱名振當世凡十辟公府九舉賢良方正公車特徵玄纁禮聘又家拜犍為太守大中大夫先生盤桓育德莫之肯就不隕穫于貧賤不充詘于富貴拔乎其萃出乎其類生民之傑也年七十有七熹平二年四月辛巳卒于是從游弟子陳留申屠蟠等悲悼傷懷懼微言之欲絕感絕倫之盛事乃建碑於墓甄述景行邇矣先生應天淑靈孝友是備上德是經弘此文藝耽怡是寧恂恂善誘童冠來誠有燧其譽有煥其聲顯顯

羣公並加辟命赫赫聖皇仍獲其聘委策避國守此玄
靜綽乎其裕確乎其操疇昔洪崖雙名並高嗟乎殞沒
搢紳永悼依依我徒靡則靡效勒銘金石彌遠益曜

貞節先生范史雲碑

先生諱丹字史雲陳留外黃人陶唐氏之後也其在周
室有士會者為晉大夫以受范邑遂以為氏漢文景之
際爰自南陽來家于成安生惠延熹二年官至司農廷
尉君則其後也君受天正性志高行潔在乎幼弱固已

藐然有烈節矣時人未之或知屈為縣吏亟從仕進非
其好也退不可得乃託死遁去親戚莫知其謀遂隱竄
山中涉五經覽書傳尤篤易與尚書學立道通久而後
歸遊集太學知人審友苟非其類無所容納介操所在
不顧貴賤其在鄉黨也事長惟敬養稚惟愛言行舉動
斯為楷式郡縣請召未嘗屈節其有備禮招延虛已迓
止亦為謀奏盡其忠直以處士舉孝廉除郎中萊蕪長
未出京師喪母行服故事服闋後還郎中君遂不從州

郡之政凡其事君過則弼之闕則補之通清夷之路塞
邪枉之門舉善不拘階次黜惡不畏強禦其事繁多不
可詳載雅性謙儉體勤能苦不樂假借與從事荷負徒
行人不堪勞君不勝其逸辟太尉府俄而冠帶或以羣
黨見嫉時政用受禁錮君罹其罪閉門靜居九族中表
莫見其面晚節禁寬困于屢空而性多檢括不治產業
以為卜筮之術得因吉凶道治民情以受薄償且無咎
累乃彌卦于梁宋之域好事者覺之應時輒去禁既蠲

除太尉張公司徒崔公前後四辟皆不就仕不為祿故
不牽于位謀不苟合故特立于時是則君之所以立節
明行亦其所以後時失途也年七十有四中平二年四
月卒太尉張公兗州劉君陳留太守淳于君外黃令劉
君僉有休命使諸儒叅按典禮作誄著謚曰

貞節先生昭其功行錄記所履謀于耆舊刊石樹銘
先示來世於顯貞節天授懿度誕茲明哲允迪德譽
如淵之清如玉之素澗之不濁涅之不汙用行思忠

舍藏思固伯夷是師史鮪是慕崇貧安賤不恤窮達甘
死善道遺名之故身沒譽存休聲載路

王子喬碑

王孫子喬者蓋上世之真人也聞其僊舊矣不知興于
何代博問道家或言潁川或言彥蒙初建斯域則具斯
丘傳承先人曰王氏墓紹胤不繼荒而不祠歷載彌年
莫之能紀暨于永和元年十有二月當臘之夜上有哭
聲其音甚哀附居者徃聞而怪之明則登其墓察焉洪

雪下無人踪見一大鳥跡在祭祀之處左右咸以為神
其後有人著絳冠絳大衣杖竹策立冢前呼采樵孺子
尹禿謂曰我王子喬也爾勿復取吾先人墓前樹也須
臾忽然不見時令太山萬熙稽故老之言感精瑞之應
咨訪其驗信而有徵乃造靈廟以休厥神于是好道之
儔自遠來集或絃歌以詠太一或談思以歷丹田其疾
病疴瘵者靜躬祈福即獲祚若不虔恪輒顛踣故知至
德之宅兆真人之先祖也延熹八年秋八月皇帝遣使

者奉犧牲以致祀祇懼之敬肅如也相國東萊王章字伯義以為神聖所興必有銘表昭示後世是以賴鄉仰伯陽之踪關民慕尹喜之風乃會長史邊乾訪及士隸遂樹玄石紀頌遺烈俾志道者有所覽焉詞曰

伊王君德通靈含光耀東純貞應大道羨久榮棄世俗飛神形翔雲霄浮太清乘螭龍載鶴輶戴華笠奮金鉉揮羽旗曳霓旌權罔極壽億齡昭篤孝念所生歲終闕發丹情存墓冢舒哀聲遺鳥跡覽舊城被絳衣垂紫纓

呼孺子告姓名由此悟感怖驚修祠宇反几筵饋饍進
甘香陳時傾顧聲明裡匡流祉熙帝庭祐邦國相黔民
光景福耀無垠

玄文先生李子材銘

玄文先生名休字子材南陽宛人也其祖李伯陽周柱
下史覲衰世而遁焉其後雄俊豪傑徃徃崛起自戰國
及漢名臣繼踵支胄散逸其遷于宛尚矣王莽竊位漢
祚中移考翼佐世祖匡復郊廟錫封茅土卿相牧守于

時相逐休少以好學游心典謨既綜七經又精羣經約
深極奧窮覽妙旨居則玩其辭動則察其變雲物不顯
必考其占故能獨見前識以先神意若古今常難疑義
錯繆前人所希論後學所不覽休盡剖判剝散幽暗靡
不昭爛猶發憤于目所不覩體所不聞遂登東岳觀百
王遺風習容闕里以協禮衷退而講誨童冠仰馬傳傳
如也郡署五官掾功曹司空胡公顯以儒譽特進大鴻
臚仍優禮固請秉讓執虛辭此三命不為利回不為義

疾臨寵審已不動其守可謂純潔皓素綽有餘裕者已
其于鄉黨細行敦睦九族篤信交友不可得而詳也初
娶配出後配未字年既五十苗胤不字以永壽二年夏
五月乙未卒凡其親昭朋徒相與大會而葬之鼎俎之
禮節文曲備時令戴君臨喪命謚郡遣丞掾冠蓋咸屆
既定而後罷焉于是故好朋舊僉以仲尼既沒文不在
茲韞櫝美玉喪莫賈之求而無繼懷爾永思乃刊斯石
懿德是不吁茲先生秉德恭勤天啓哲心其學孔純經

緯是綜雅麗是分行已守道匪禮不遵處約不戚聞寵
不欣榮不能華威不能震天淑厥命以讓以仁有惠云
載惟邦之珍按典考謚謚以玄文身沒名彰配黔作隣
遺譽罔極丕昭億年嗚呼哀哉

處士國叔則銘

鼎按董道廣川書跋辨四皓名曰國公自是秦博士周庾以常

居國中故謂國公蔡邕集載有國
典此則云國音混鼠所居也不同

伊漢二十有一世處士有國典字叔則者夫其生也天
真淑性清理條暢精微周密包括道要致思無形深總

歷部纖入藝文藻分葩列如春之榮守根據窮不虛其
聲偉德若茲惟世之英乃遂隱身高藪稼穡孔勤童蒙
來求彪之用文不義富貴譬諸浮雲州郡禮招休命交
集徒加名位而已莫之能起也博士徵舉至孝耻已處
而復出若有初而無終潔耿介于丘園慕七人之遺風
年七十有五建寧二年六月卒臨沒顧命曰知我者其
蔡邕乃為銘載書休美俾來世昆裔永有諷誦于先生
之德其辭曰

民之齊敏卓時挺生思心精覈綜物通靈術有玄妙于
時游情聞道睹異惕然若驚守死善操與世無營渾其
若濁徐然後清綽其若煥終其益貞有恒實難獨秉其
經嗟爾來世是瞻是聽

陳留索昏庫上里社銘

曰社祀之建尚矣昔在聖帝有五行之官而共工子句
龍為后土及其沒也遂為社祀故曰社者土地之主也
周禮建為社位左宗廟右社稷戎醜攸行于是受脤土

膏恒動于是祈農又頒之于兆民春秋之中命之供祠
故自有國至于黎庶莫不祀焉惟斯庫里古陽武之戶
牖鄉春秋時有子華為秦相漢興陳平由此社宰遂佐
高帝克定天下為右丞相封曲逆侯永平之世虞延為
太尉司空封公至嘉平延弟曾孫放字子卿為尚書外
戚梁冀乘寵作亂首策誅之王室以續封召都亭侯太
僕太常司徒毗天子而維四方克措其功徃烈有常于
是司監爰暨邦人僉以為宰相繼踵咸出斯里秦一漢

三而虞氏世焉雖有積善餘慶修身之致亦斯社之所相也乃與樹碑作頌以示後昆

惟王建祀明事百神乃顧斯社于我兆民明德惟馨其慶聿彰自嬴及漢四輔代昌爰我虞宗乃世重光元勲既立錫茲土疆乃公乃侯帝載用康神人協祚且巨且長凡我里人盡受嘉祥刊銘金石永世不忘

郡掾史張玄祠堂碑銘

掾諱玄字伯雅河南偃師人也其先張仲者實以孝友

為名左右周室大漢初興張蒼為丞相封北平侯其後
自河南遷于茲土世為顯姓掾天安恭恪宣慈惠和允
恭博敏惻隱仁恕正身履道以協閭庭損用節財以贍
疏族動中規矩言合典式不知名彰不飾行者可謂仁
粹淑貞自然之素者已論者嘉之州郡禮招署致掾史
沉静寡欲不求榮祿是以豐于天爵薄于人位某月日
遭疾而卒掾孫翻以貞固之質受過庭之訓獲執戟出
宰相邑遷太守得大夫之祿奉烝嘗之祀尋原祚之所

由而至於此先考積善之餘慶陰德之陽報乃于是立
祠堂假碑勒銘式明令德以示乎後辭曰

於惟我考允迪懿德治信斯順其儀不忒仁惠周洽行
惟模則篤垂餘慶貽此燕翼邈矣遺孫用懷多福刊名
金石流于罔極

袁滿來碑銘

茂德休行曰袁滿來太尉公之孫司徒公之子逸才淑
姿實天所授聰遠通敏越巖在闕明習易學從誨如

流百家衆氏過目能識事不再舉問一及三具始知終
情性周備夙有奇節孝智所生順而不驕篤友兄弟和
而無忿氣決泉達無所凝滯雖冠帶之中士校材考行
無以加焉允公族之殊異國家之輔佐衆律其器士嘉
其良雖則童稚令聞芬芳降生不永年十有五四月士
寅遭疾而卒既苗而不穗凋殞華英嗚呼悲夫乃假碑
旌于墓表嗟其傷矣惟以告哀

童幼胡根碑銘

故陳留太守胡君子曰根字仲原生有嘉表幼而克才
角犀豐盈光潤玉顏聰明敏惠好問早識言語所及智
思所生雖成人之德無以加焉稟命不長夙罹凶災年
七歲建寧二年遭疾夭逝慈母悼痛昆弟孔懷感襁褓
之親愛憐國城之乖離乃權宜就封二祖墓側親屬李
陶等相與追慕先君悲悼遺嗣樹碑刊辭以慰哀思辭
曰

於惟仲原應氣淑靈寶有令儀而氣如瑩明之之性與

體俱生聞言斯識覩物知名傳者太勤受誨則成柔和
順美與人靡爭忿不怨懟喜不驕盈當受福永為光為
榮如何昊天降此短齡惜繁華之方晷兮望嚴霜而凋
零嗟童孺之夭逝兮傷慈母之肝情從皇祖乎靈兆兮
庶神魄之斯寧哀慘戚以流涕兮念污軫之不呈顧永
懷于不朽兮乃託辭于斯銘

司空袁逢碑

此下至夷齊
碑集並不載

凡所臨君明而先覺故能教不肅而化成政不嚴而事

治其惠和也晏晏然其博大也洋洋焉信可謂兼三才而該剛柔無射于人斯矣銘曰

天鑒有漢賜茲世輔顯允厥德昭膺休序戢戢雍宮禮樂備舉穆穆天子孝敬允敘降拜屏著奉饋西序威儀聿修化溢區宇乃尹京邑物惣齊禁旅

司空房楨碑銘

公言非法度不出于口行非至公不萌于心治身則伯夷之潔也儉嗇則季文之約也盡忠則史魚之直也剛

平則山甫之勵也愍茲四德式是百辟夙夜匪懈以事
一人枉絲髮樹私恩不為也討無禮當彊禦弗避也是
以功隆名顯在世孤特不獲愷悌寬厚之譽享年垂老
至于積世門無立車堂無宴客衣不變裁食不兼味雖
易之貞厲詩之羔羊無以加也明明在公實惟房后誕
應正德式作漢輔邪慝是仇直亮是與剛則不吐柔則
不茹媚茲天子以靖土宇

荊州刺史庾侯碑

君資天地之正氣含太極之純精明絜鮮于白珪貞操
厲乎寒松視鑒出于自然英風發乎天骨事親以孝則
行侔于曾閔結交以信則契明于黃石溫溫然弘裕虛
引落落然高風起世信荆山之良寶靈川之明珠也爰
在弱冠英風固以揚于四海矣拜為荊州刺史杖冲靜
以臨民施仁義以接物恩惠著于萬里誠信暢于殊俗
由是撫亂以治綏擾以靜也帝嘉其功錫以車服方將
掃除寇逆清一宇宙廓天步之艱難寧陵夷之屯否

瞿先生碑

世以仁義為質學問為業爰暨先生固天縱德應運立
言繼期五百實行形于州里明哲與聖合契該通五經
洗洞墳籍為萬里之場圃九隩之林澤挹之若江湖仰
之若華光玄玄焉測之則無源汪汪焉酌之則不竭可
謂生民之英者已國失元博學失表式凡百措紳衮矣
泣血人百身匪云云來復于是鄉黨乃相與登光山伐
石而勒銘曰

邈矣先生厥德孔真腹心弘道深高入神王錫三命觀
國之賓其樹富貴忽若浮雲既不降志亦不辱身

並藝文類

楊復卑

北堂書抄

文學之徒擁書抱籍自遠而至稟采豐華斟酌洪流者
雍雍焉閭閻焉

貞定直父碑

其接友也審辨真偽明于知人度終始而後交情不踈

而貌親

蔡攜碑

後漢書注

攜字叔業有周之胄昔蔡叔沒成王命其子仲使踐諸
侯之位以國氏姓君其後也君曾祖父勲哀帝時以孝
廉為長安郡長及君之身增修厥德順帝時以司空高
弟遷新蔡長年七十九卒長子稜字伯直處俗孤黨不
協于時垂翼華髮人爵不升年五十三卒謚法曰清白
守節曰貞純行不差曰定

伯夷叔齊碑

此載後漢書五行志後載藝文蓋前為序後為銘或頌總一碑也

熹平五年天下大旱禱請名山求獲峇應時處士平陽
蘇騰字玄成夢陟首陽有神馬之使在道明覺而思之
以其夢陟狀上聞天子開三府請雨使者與郡縣戶曹
掾吏登山升祠手書要曰君況我聖主以洪澤之福天
尋興雲即降甘雨也

惟君之質體清良兮昔在殷姬忠孝彰兮委國捐爵諫
國闕兮譏武伐紂欲喻匡兮時不可救歷運蒼兮追念

先侯受命皇兮

關四

憂懷感兮雖沒不朽名字芳

兮

京兆尹樊德雲碑銘

於顯哲尹誕德孔彰膺帝休命謂篤不忘爰納忠式規
悟聖皇欽崇園邑大孝允光九命車服昭示采章軒輶
四牡承祀蒸嘗多士時貢徭役永息道路孔夷民清險
棘同體諸舊兆氓蒙福惠垂無疆守以罔極

漢交趾都尉胡夫人黃氏神誥

夫人江陵黃氏之季女字曰列羸其先出自伯翳別封
于黃以國氏焉高祖父汝南太守曾祖父延城大尹祖
父番禺令父以主簿常證太守事奉明君以立臣節漢
南之士以為美談初都尉君娶于故豫州刺史即黃君
之姊生太傅安樂侯廣及卷令康而卒繼室以夫人生
童紀未齒而天夫人懷聖善之姿韜慈母之仁撫育二
孤導以義方思齊先姑神罔時恫故能迄用有成誕膺
繁祉廣歷五卿七公再封之祿康亦由孝廉宰牧二城

九鼎之義夫人是享爰暨稚孫更仕三宮或典百里或作虎臣銀艾貂蟬近侍顯尊受茲介福于我夫人自郡尉仕于京師及廣兄弟式敘漢朝夫人居京師六十有餘載其乘輅執贄朝皇后採桑桑于蠶宮手三盆于蘭館者蓋三十年上有帝室寵光之休下有堂宇斤斤之祚心耽其榮體安其玄遠圖長慮慮用遺舊居欲留此焉康寧之時亟以為言太夫人年九十一建寧二年薨于太傅府是月辛酉公之季子陳留太守碩卒于洛陽

左池里舍公銜哀悼祇慎其屬遵奉遺意不敢失墜乃
俾元孫顯咨度羣儒以考其衷僉曰昔帝舜没于蒼梧
殞于虞郊二妃薨于江湘不即兆于九疑延陵季子實
惟吳人長子道終卜葬羸博夫遭時而制不遠遷徙魂
氣所之不繫丘壠帝舜以之神罔時怨季札以之仲尼
嘉焉鑒帝藉之高論綜精靈之幽情稽先人之遐迹順
母氏之所寧茲事體通而義同允不可替于是公乃為
辭昭告先考然後卜定宅兆龜筮悉從遂營窆窆之事

舉封樹之禮十月既望粵翌日己酉葬我夫人黃氏及
陳留太守碩于此高原雒陽東界闕亭之阿天子使中
常侍謁者李納弔且送葬持賻錢二十萬布二百疋再
以中牢祠羣后畢會榮哀孔備于時濟陽故吏舊民中
常侍勾陽于肅等二十三人思應慕化推本議銘著斯
碑石俾諸昆裔瞻仰以知禮之用是為神語乃申頌曰
於穆夫人家邦之媛昔在嬴代黃國氏建至于近祖亦
降于漢天祚明德福祿流衍既作母儀履信思順登壽

老耄耄用永蕃孿子孫以仁追稽先典厝茲洛濱齊跡湘
靈配名古人休矣耀光千億斯年

太傅安樂侯胡公夫人靈表

夫人編縣舊族章氏之長女也字曰顯章令儀小心秉
操塞淵仁孝婉順率禮無遺體季蘭之姿蹈思齊之跡
永初二年年十有五爰初來嫁誕成家道仰奉慈姑竭
歡致敬俯誨膝下化尊周悉至德修于幾微徽音暢于
神明故能叅妊姒之功蕪生人之榮朝春路寢贊桑蠶

宮光寵有祭祭服有珎前後奉斯禮者三十餘載夫人
生五男長曰整伯齊次曰千億叔韓次曰寧穉威次曰
碩季叡伯仲各未加冠遭厲氣同時夭折叔上郡孝廉
季更歷州寧舉茂才葉令京令為議郎季以高第為侍
御史諫議大夫侍中虎賁中郎將陳留太守皆早即世
夫人哀悼劬悴由是被疾遭太夫人憂篤年七十七建
寧三年薨夫人之存也契濶中饋婉戀供養依生奉仁
紹述雅意其閨月附于太夫人窀穸于茲地魂而有靈

欽明定省神心欣焉其實寧之元女金盈追慕永思惜
恒罔極遂及斯表鐫著堅珉頌曰

悲母氏之不永懷殷恤以摧傷惟子道之無窮惜聞誨之
未央庶黃耆以期頤胡委我以夙喪恒思心以激切亦割肝以
絕腸昔先聖之遺辭言仁者其壽長嗟母氏之憂患
體愴悌以慈良失延年之報祐獨何棄于穹蒼日月
忽以將暮抱長結以含愁尋修念于在昔原疾病之
所由遭元子之弱天心傷悴以自憂暨叔季之殞終

哀情結以彌綢皇姑沒而中感遂大漸兮速流疾蹙蹙
而日邁氣微微以長浮銷精魂以遐翔曾不可乎援留
爾乃順旨于冥冥繼存意于不違爰祔靈于皇姑尚魂
魄之有依潛幽室之黯漠惜昭明之景輝一往超以末
及傾徂邈其彌遲顧新廟以累歆伏几筵而增悲嗟既
逝之益遠眇悠悠而莫追

司徒袁公夫人馬氏碑銘

維光和七年司徒袁公夫人馬氏薨其十一月葬哀子

懿達仁達銜恤哀痛靡所寫懷乃撰錄母氏之德履示公之門人覩文感義采石于南山謔之羣儒假貞石以書焉夫人右扶風平陵人也曾祖中水侯祖將作大匠考南郡太守中水侯弟伏波將軍女在淑媛作合孝明誕生孝章婚姻帝室世為名族夫人生應靈和德精性妙角犀豐盈實有偉表溫慈惠愛慎而寡言幼從師氏四禮之教早達窈窕德象之儀及笄求匹明哲供治婦業孝敬婉孌畢力中饋後生仰則以為謀憲自公歷據

王官至宰相夫人營克家道扶翼政事聰明達乎中外
隱括及乎無方不出其機化導宣暢童子無驕逸之尤
婦妾無捨力之愆故能窮生人之光寵獲福祿之豐報
朝春政于王室窮桑繭於蠶宮春秋六十有三寢疾不
永懿等追想定省尋思髮髻哀窮念極不知所裁乃申
辭曰

於穆母氏其德孔休思齊先始百行聿修宣慈惠和恩
澤並周義方之訓如川之流俾我小子蒙昧以漚不享

遐年以永春秋往而不返潛淪大幽嗚呼哀哉几筵虛設幃帳空陳品物猶在不見其人魂氣飄飄焉所安神兄弟何依姊妹何親號咷忉怛曾不我聞吁嗟上天何辜而然傷逝不續往者不旋

議郎胡公夫人哀讚

議郎夫人趙氏字曰永姜允有令德秉心塞淵舒詳閑雅儀節孔備女師四典窈窕德象罔不習熟以供婦道議郎早世檢誨幼孤義方以導其性中禁以閑其情孤

顯儉節用免咎悔少辟侍中襲先公之爵以議郎出為
濟陰太守是時夫人寢疾未薨而國家方有滎陽寇賊
震驚帝師簡選州辟授任進衛不得辭王命親醫藥夫
人乃自矜精稟氣力俛起若愈以勸遣顯到官月餘所
疾暴盛春秋五十八中平四年薨于京師顯有剖符之
寄偏于國典疾篤不得顧親增感氣絕不能自宥慎終
之事闕焉永廢雖不毀以隨沒亦困悴而傷懷知我如
此不如勿生號咷告哀以乞骸骨踰年然後獲聽追惟考

君存時之命迎棺舊土同穴此城孤心摧割靡所底念
仰瞻二親或有神誥靈表之文敢曰亮闇叙我憂痛作
哀讚書之于碑

愍予小子夙罹孔艱嚴考殞沒我在齠年母氏鞠育載矜
載憐殷斯勤斯慈愛備存匪惟驕之範我軌度教誨嚴肅昭
示好惡俾我克類畏威忌怒用免咎悔踐繼先祖即爵其土二
將是臨與帝剖符守於濟陰夫人寢疾榮此寵休疾用歡痊
翊日斯瘳將征將邁從養陶丘景命徂逝不愍少留疾

大漸以危亟兮精微微而浸衰逼王職于憲典兮子孫
忽以替違目不臨此氣絕兮手不親夫含飯陳衣衾而
不省兮合綆棺而不見昔予考之即世兮安宅兆于舊
邦依存意以奉亡兮遷靈柩而同來考妣痛以慘兮離
乖神柩集而移兮增哀黃壚密而無間兮出入閭其無
門昇柩在茲兮不知魂景之所存悼孤衷之不遂兮思
情慄以傷肝幽情淪于后坤兮情哀達乎昊乾

劉鎮南碑

歐靜序云劉鎮南碑建安十三年薨
太和二年葬按邕本傳董卓被誅邕

為王允所害獻帝初平三年也後改年興平
復改建安而太和乃魏明帝時計邕死已三
十餘年矣安得紀述耶○序又示宗廟頌贊
述武皇平亂之功又有昊天眷祐我魏之句
蓋以宗廟指魏也又有魏武帝祀喬太尉文
稱丞相冀州牧魏主操謹遣掾再拜今集未
載

君諱表字景升山陽高平人也君應期挺生瑰偉大度
黃中通理博物多識為郡功曹千里稱平上計吏辟大
將軍府遷北軍中侯在位十旬以賢能特選拜刺史荊
州永平元年十一月到官清風先驅莫不震肅姦宄改

節不仁引頸君乃頌愷悌流惠和慕唐叔之野棠思王
遵之驅印賦政造次德化宣行俄而漢室大亂禍起蕭
牆賊臣專政豪雄虎爭縣邑閭里姦宄烟發州縣殘破
天下土崩四海大壞當是時也雖有孔翟之聖賢育貢
之勇勢無所措其智力君遇險而建略遭難而發權招
命英俊爰得驍雄謀臣武將合策明計出次北境遷屯
漢陰因滄浪以為隍即春葉以為牖南撫衡陽東綏淄
沂西靖巫山保入四疆選才任良式序賢能簡將命卒

綦布星陳備要塞之處戍八方之邊勸穡務農以田以
漁稔粟紅腐年穀豐夥江湖之中無劫掠之寇沅湘之
間無攘竊之民郡守令長冠帶章服府寺亭鄉崇棟高
門皆如其舊當世知名輻輳而至四方襁負自遠若歸
窮山幽谷于是為邦百工集趣機巧萬端器械變通民
利無窮隣邦懷慕交揚益州盡遣驛使冠蓋相望下民
有康哉之歌羣后有歸功之緒莫匪嘉績克厭帝心即
遷州牧又遷安南將軍領州如故于時諸州或失土流

播或水潦沒害人民死喪百遺二三而君保完萬里至
于滄海聖朝欽亮析圭授土遣御史中丞鍾繇即拜鎮
南將軍錫鼓吹大車策命褒崇謂之伯父置長史司馬
從事中郎開府辟召儀如三公上復遣左中郎將祝耽
授節以增威重並督交揚二州委以東南惟君所裁雖
周召授分陝之任不遠過也交州殊遠王塗未夷夷民
歸附大小受命其郡縣長吏有缺皆來請之君權為選
置以安荒裔輒別上聞齊桓遷邢封衛之義也武功既

亢廣開廳泮設俎豆陳壘彝親行鄉射躋彼公堂篤志
好學吏民子弟受學之徒蓋以千計洪生巨儒朝夕講
論閭閻如也雖洙泗之間學者所集方之無異也深愍
末學遠本離實乃令諸儒改定五經章句刪剗浮辭芟
除煩重又求遺書寫還新者留其故本于是古典畢集
充于州閭及延見武將文吏教令溫雅禮接優隆言不
及軍旅之事辭不逮官曹之文上論三墳八索之典下
陳世教忠義之方內剛如秋霜外柔如春陽不伐其善

不有其庸如彼川流每往茲通可謂道理丕才命世希
有者已仁者壽宜享期耆昊天不弔年六十有七建安
十三年八月邁疾殞薨耕夫罷耜織女投杼老幼哀
號若喪父母時道路艱險留墳州土轉移歸葬父勉其
子妻勉其夫欲共扶送至于鄉里南陽太守樂鄉亭侯
旻思等言及志在州里者各發卒具送靈柩之資子授
徵拜五官中郎將乃䟽上請歸本縣葬見聽許太和二
年葬于先塋于是故臣忻洽咸以為申伯韓侯之翼周

室受輅車乘馬玄裘赤舄之賜詩人詠功列于大雅至
今不朽況乎將軍牧二州歷二紀功載王府賜命優備
賴而生者毓子孕孫能不歌嘆乃作頌曰

猗歟將軍膺期挺生桓桓其武溫溫其仁初幹千里允
顯使臣幕府禮命集于北軍督齊禁旅如羆如熊眷然
南顧綏我荆衡將軍之來民安物豐江湖交壤刑清國
興蔽芾甘棠召伯聽訟周人勿剗我賴其楨欲報之德
胡不億年如何殂逝孤棄萬民鐫勒墓石以紀洪勲昭

示來世垂芳後昆

東漢文紀卷二十二

欽定四庫全書

東漢文紀卷二十三

明 梅鼎祚 編

蔡邕

五

東鼎銘

水經注 睢陽城北橋玄墓碑主記 據李友撰大碑陰有右鼎中鼎左鼎征鉞文

不云
邕撰

維建寧三年秋八月丁丑延公於玉堂前廷乃制詔曰
其以大鴻臚橋玄為司空再拜稽首以讓帝曰俞往哉
三讓然後受命公乃虔恭夙夜帝采勤施八方旁作穆

穆以對揚天子丕顯休命越在先民毗于天子罔不著
其股肱畢其思心式率天行式昭德音公亦克紹厥猷
鑒于法罔敢不法憲于誠罔敢不誠用總是羣后保乂
帝家勲在方冊民咸曰休哉惟帝念功越若來二月丁
丑遷于司徒

中鼎銘

維建寧四年三月丁丑延公登于玉堂前廷乃制詔曰
其以司空橋玄為司徒公拜稽首以讓帝曰俞往哉三

讓然後受命公允迪厥德宣力肆勤戰戰兢兢以役帝
事率夫百辟媚于天子天子曰都慎厥身修思永同寅
協恭以和天衷德則昭之違則塞之回乃不敢不弼枉
乃不敢不匡股肱之事既克三事之繇允備災眚作見
乃引其責曰凡庶徵不若彝倫不敘是惟臣之職祇以
疾告表越十月庚午記此

西鼎銘

維光和元年冬十二月丁巳延公入崇德殿前乃制詔

曰其以光祿大夫玄為太尉公拜稽首曰臣聞之三讓
莫或克從臣不敢辭臣犬馬齒七十可以生可以死其
戮力閑私悉心在公以盡為臣之節于時侍從陞階與
聞公之昌言者莫不惕厲如履薄冰既乃碑表百代

黃鉞銘

孝桓之季年鮮卑入塞抄盜匈奴左部梁州叛羌逼迫
兵誅淫衍東夷高句麗鬪子百固逆謀並發三垂騷然
為國憂念西府表橋公昔在涼州柔遠能邇不煩軍師

而車師克定及在上谷漢陽連在營郡督力方剛明集
御衆徵拜度遼將軍始受旄鉞鉦鼓之任扞禦三垂公以
吏士頻年在外勤于奔命人馬疲羸撓鈍請且息州營
橫發之役以補困憊朝廷許之于是儲廩豐饒室罄不
懸人逸馬同弓勁矢利而經用省息官有餘資執事無
放散之尤簿書有進入之羸治兵示威戎士踴躍旌旗
耀日金鼓霆奮守有山嶽之固攻有必克之勢羌戎授
首于西疆百固冰散于東鄰鮮卑收迹烽燧不舉眎事

三年馬不帶鉞弓不受疆是用鏐石作茲征鉞軍鼓陳之東階以昭公文武之勲焉銘曰

帝命將軍秉茲黃鉞威靈振耀如火之烈公之在位羣狄斯柔齊斧罔設人士斯休

朱公叔鼎銘

忠文朱公名穆字公叔有殷之胄微子啟以帝乙元子周武王封諸宋以奉成湯之祀至元子啟生公子朱其孫氏焉後自沛遷于南陽之宛遂大于宋爵位相襲烈

祖尚書令肅宗之世守于臨淮考曰實為陳留太守乃
及忠丈克慎明德以紹服祖禰之遺風悉心臣事用媚
天子顯允其勲蹟尋綜六藝契濶馳思所以啓前惑而
覺後疑者疊疊焉雖商偃其猶病諸初舉孝廉除郎中
尚書侍郎獨念運際存亡之要乃陳五事諫謀深切退
處畝畝以察天象驗應著焉孝順晏駕賊發江淮時辟
大將軍府實掌其事用拜宛陵令非其好也遂以疾辭
復辟大將軍再拜博士高第作侍御史明司國憲以齊

百寮矯枉董直罔肯阿順以黜其位潛于郎中羣公並表乃遷議郎登于東觀纂業前史于時冀州凶荒年饑民匱而貪婪之徒乘之為虐錫命作牧靜其方隅乃攄洪化奮靈武昭令德塞羣違貞良者封植殘戾者芟夷去惡除盜無俾比而作慝用陷于非辜復徵拜議郎病免官徵拜尚書清一以考其素正直以醇其德出納帝命乃無不允雖龍作納言山甫喉舌靡以尚之享年六十有四漢皇二十一世延熹六年夏四月乙巳卒于官

天子痛悼詔曰尚書朱穆立節忠亮世篤爾行虔恪機
任守死善道不幸而卒朝廷憫焉今使權謁者中郎楊
賁贈穆益州刺史印綬魂而有靈嘉其寵榮嗚呼哀哉
肆其孤用作茲寶鼎銘載休功俾後裔永用享祀以知
其先之德

九疑山銘

巖巖九疑峻極于天觸石膚合興播連雲時風嘉雨浸
潤下民芒芒南土寶賴厥勲逮于虞舜聖德光明克諧

頑傲以孝蒸蒸師錫帝世堯乃授徵受終文祖璇璣是
承泰階以平人以有終遂葬九疑解體而升登此崔嵬
託靈神仙

樽銘

酒以成禮弗愆以淫德將無醉過則荒沈盈而不沖古
人所箴尚鑒茲器懋勗厥心

勗玉海
作勉

警言枕銘

應龍蟠蟄潛德保靈制器象物示有其形哲人降鑒居

安慮傾

太平御覽

衣箴

今人務在奢嚴志好美飾帛必薄細衣必輕煖或一朝之宴再三易衣私居移坐不因故服

盤銘

華盤就用以享嘉賓內納其實外若玄真

祖德頌

昔文王始受命武王定禍亂至于成王太平乃洽祥

瑞畢降夫豈后德熙隆漸浸之所通也是以易嘉積善
有餘慶詩稱子孫保之非特王道然也賢人君子修仁
履德者亦其有焉昔我烈祖暨于予考世載孝友重以
明德率禮莫違是以靈祇降之休瑞免擾馴以昭其仁
木連理以象其義斯乃祖禰之遺靈盛德之所貺也豈
我童蒙孤稚所克任哉乃為頌曰

穆穆我祖世篤其仁其德克明惟懿惟醇宣慈惠和無
競伊人巖巖我考蒞之以莊增崇丕顯克構其堂是用

祚之休徵惟光厥徵伊何於昭于今園有甘棠別幹同心墳有擾兔宅我栢林神不可誣偽不可加析薪之業畏不克荷矧貪靈眈以為已華惟予小子豈不是欲干有先功匪榮伊辱

胡廣黃瓊頌

靈帝熹平六年圖畫太傅胡廣太尉黃瓊于省內詔議郎蔡邕為頌

見謝承書

巖巖山嶽配天作輔降神有周生申及甫允茲漢室誕育二后曰胡曰黃方軌齊武惟道之淵惟德之藪股肱

元首代作心膺天生蒸民有則有類我胡我黃鍾厥純
懿巍巍特進仍踐其位赫赫三事七佩其紱奕奕四牡
沃若六轡袞職龍章其文有蔚叅曜乾台窮寵極貴功
加八荒羣生以遂超哉邈乎莫與為二

京兆樊惠渠頌

洪範八政一曰食周禮九職一曰農有生之本於是乎
出貨殖財用于是乎在九土上沃為大田多稔然而地
有埆堵川有墊下溉灌之便行趨不至明哲君子創業

農事因高卑之宜驅自行之勢以盡水利而富國饒人
自古有焉若夫西門起鄴鄭國行秦李冰在蜀信臣治
穰皆此道也陽陵縣東其地衍隩土氣辛螫嘉穀不植
草萊焦枯而涇水長流溉灌維首編戶齊氓庸力不供
牧人之吏謀不假給蓋常興役猶不克成光緒五年京
兆尹樊君諱陵字德雲勤恤人隱悉心政事苟有可以
惠斯人者無聞而不行焉遂諮之郡吏申于政府僉以
為因其所利之事者不可已者也乃命方略大吏趨遂

令伍瓊揣度計利揆程經用以事上聞副在三府司農
遂取財于豪富借力于黎元樹柱累石委薪積土基跂
工堅體勢強壯折湍流歛曠陂會之于新渠疏水門通
甯瀆灑之于畎畝清流浸潤泥潦浮游昔日鹵田化為
甘壤粳黍稼穡之所入不可勝筭農民熙怡悅豫相與
謳談疆畔斐然成章謂之樊惠渠云其歌曰

我有長流莫或遏之我有溝澮莫或達之田疇斥鹵莫
修莫釐饑饉困悴莫恤莫思乃有樊君作人父母立我

猷畝黃潦膏凝多稼茂止惠乃無疆如何勿喜我壤既
營我疆斯成泯泯我人既富且盈為酒為釀蒸彼祖靈
貽福惠君壽考且寧

樊陵頌序

後漢書注

前漢戶五萬口有十七萬王莽後十不存一永初元年
羌戎作虐至光和領戶不盈四千園陵蕃衛菜盛之供
百役出焉民用匱乏不堪其事

陳留太守行小黃縣頌

藝文類聚集不載

大顯為政建時春陽我君勸止戾茲小黃濟濟羣吏攝
齊升堂乃訓乃厲示之憲方原罪以心察獄以情欽于
刑濫惟務求輕有辜小罪放死從生玄化洽矣黔首用
寧惟以作頌式昭德聲

考城縣頌

藝文
類聚

曖曖玄路北至漢城勸茲穡民東作是營農桑之業為
國之經我君勤心德音邈成率爾苗民慎不敬聽女執
伊筐男執其耕申戒羣僚務在寬平罪人赦宥囹圄用

清

潁川太守王立頌

立義葬流
民邕為頌

哀此骷髏寬體孤魂遭水為泥逢風成塵殮以時服葬

以洛濱

北堂
書抄

五靈頌

大梁乘精白虎用生思敵信立繞于垣垠

麟頌

皇矣大角降生靈獸視明禮修麒麟來孚春秋既書

爾來告就庶士子鉏獲諸西狩

焦君贊

猗歟焦君常比玄墨衡門之下栖遲偃息泌之洋洋樂
以忘食鶴鳴九臯音亮帝側乃徵乃用將受袞職昊天
不弔賢人遘慝不獲一志并此四國如何穹蒼不照西
域惜哉朝廷喪茲舊德恨伊學士將何法則

太尉陳公贊

公在百里有西產之惠賜命方伯分陝餘慶餘慶伊何

兆民其觀少者是懷老者是安網紀文王文王用平東
督京輦京輦用清乃登三事三事以寧契稷之佐具于

堯庭今則由古於穆誕成

藝文類聚○竹贊云
綠潤碧鮮紺文紫錢

濟北相崔君夫人誄

維延熹四年故濟北相崔夫人卒嗚呼哀哉世喪母儀
宗殞憲師哀哀孝子靡所瞻依凡百赴弔至止增悲投
涕歔歔共敘赫姿乃為誄曰

清和有鑠時惟哲母令儀令色爰以資始塞淵其心淑

慎其止于母斯勤在子斯敏仰覽篇籍俯釐絲枲多才
多藝于何不有休譽邈焉允女之英乃及崔君惟德是
行其德伊何實粹實明虔恭事幾契濶中饋敦此婉順
疾彼攸遂思齊徽音晨興夜寢穆穆其猷莫之與二天
祚明德底之方穀於赫崔君膺茲祉祿夫人有膺翼此
清淑仁風溫潤義惠優渥推恩中外施浹族食不兼
膳服不纖縠以儉為榮以奢為辱堂堂其胤惟世之良
子其令母受茲義方訓以柔和董以嚴剛怒不傷愛喜

不亂莊納之軌度終然允臧是用登臚享其寵光雖則
崇盛猶匪寧息同其婦子茂師其職服貴無荒尊不舍
力密勿不忘惟德之極昔在共姜陪臣之母勞謙紡績
仲尼是紀矧茲夫人帝室命婦猶日孜孜復禮克己人
亦有言仁者壽長宜登永年黃耆無疆昊天不弔降此
殘殃寢疾彌留精爽悴傷慘怛孝子惴惴其惶靡神不
舉無藥不將嗚呼哀哉于是孝子長叫氣絕復蘇號呼
告哀不知其事昊天上帝忍弔遺孤尋想遊靈焉識所

徂嗚呼哀哉既殯神柩薄言于歸冢宰喪儀循禮無遺
切切喪主瘠羸哀哀情兮長慕涕兮無晞行旅揮涕千
里于咨乃謀卜筮言考其良建彼兆域于時翳藏冥冥
窀穸無時有陽燈燭既滅馬道納光形影不見定省何
望嗟其哀矣不可彌忘日月代序古有如喪由斯夫人
榮烈有章配彼哲彥既隆且昌顧景赫奕饋供孔將惟
以慰懷庶無永傷嗚呼哀哉

弔屈原文

鸛鳴軒翥鸞鳳挫翮啄碎琬琰寶其瓊瓚皇車奔而失

轄執轡忽而不顧卒壞覆而不振顧抱石其何補

藝文類聚

北堂書抄苞弔屈原文通隔世而遙弔託白水而騰文

釋誨

問居執古不交當世感東方客難及揚雄班固崔駰之徒設疑以自通乃斟酌羣言

疑其是而矯其非作釋誨以戒厲云爾

有務世公子誨于華顛胡老曰蓋聞聖人之大寶曰位故以仁守位以財聚人然則有位斯貴有財斯富行義達道士之司也故伊摯有負鼎之銜仲尼設執鞭之言

寧子有清商之歌百里有豢牛之事夫如是則聖哲之
通趣古人之明志也夫子生清穆之世稟醇和之靈覃
思典籍韞櫝六經安貧樂賤與世無營沉精重淵抗志
高冥包括無外綜析無形其已久矣曾不能拔萃出羣
揚芳飛文登天庭序彛倫掃六合之穢慝清宇宙之埃
塵連光芒于白日屬炎氣于景雲時逝歲暮默而無聞
小子惑焉是以有云方今聖上寬明輔弼賢知崇英逸
偉不墜于地德弘者建宰相而裂土才羨者荷榮祿而

蒙賜盍亦回塗要至俛仰取容輯當世之利定不拔之功榮家宗于此時遺不滅之令蹤夫獨未之思邪何為守彼而不通此胡老傲然而笑曰若公子所謂覩曖昧之利而忘昭晷之害專必成之功而忽蹉跌之敗者已公子謾爾歛袂而興曰胡為其然也胡老曰居吾將釋汝昔自太極君臣始基有義皇之洪寧唐虞之至時三代之隆亦有緝熙五伯扶微勤而撫之于斯已降天綱縱人紆弛王塗壞太極阨君臣土崩上下瓦解于是智

者騁詐辯者馳說武夫奮畧戰士講銳電駭風馳霧散雲
披變詐乖詭以合時宜或畫一策而綰萬金或談崇朝
而錫瑞珪連衡者六印磊落合縱者駢組陸離隆貴翕
習積富無涯據巧蹈機以忘其危夫華離蒂而萎條去
榦而枯女冶容而淫士背道而辜人毀其滿神疾其邪
利端始萌害漸亦芽速速方穀天天是加欲豐其屋乃
蔀其家是故天地否閉聖哲潛形石門守晨沮溺耦耕
顏歆抱璞蘧瑗保生齊人歸樂孔子斯征壅渠驂乘逝而

遺輕夫豈傲主而背國乎道不可以傾也且我聞之日
南至則黃鍾應融風動而魚上冰凝賓統則微陰萌薰
葭蒼而白露凝寒暑相推陰陽代興運極則化理亂相
承今大漢紹陶唐之洪烈盪四海之殘災隆隱天之高
拆絙地之基皇道惟融帝猷顯丕泝泝庶類含甘吮滋
揀六合之羣品躋之乎雍熙羣僚恭已于職司聖主垂
拱乎兩楹君臣穆穆守之以平濟濟多士端委縉緹鴻
漸盈階振路焉亢庭壁猶鍾山之玉泗濱之石累圭璧不

為之盈採浮磬不為之索曩者洪源闢而四隩集武功
定而干戈戢獫狁攘而吉甫宴城濮捷而晉凱入故當
其有事也則蓑笠並載擐甲揚鋒不給于務當其無事
也則舒紳緩佩鳴玉以步綽有餘裕夫世臣閥子執御
之族天隆其祐主豐其祿抱膺從容爵位自從攝須理
髯餘官委貴其進取也順傾轉圜不足以喻其便逡巡
放屣不足以況其易夫有逸羣之才人人有優贍之
智童子不問疑于老成瞳矇不稽謀于先生心恬澹于

守高意無為于持盈燦乎煌煌莫非華榮明哲泊焉不失所寧狂淫振蕩乃亂其情貪夫徇財夸者死權瞻仰此事體躁心煩閭謙盈之效迷損益之數騁駑駘于修路慕騏驎而增驅卑俯乎外戚之門乞助乎近貴之譽榮顯未副從而顛踣下獲熏胥之辜高受滅家之誅前車已覆襲軌而務駕曾不鑒禍以知畏懼予誰悼哉害其若是天高地厚跼而踏之怨豈在明患生不思戰戰兢兢必慎厥尤且用之則行聖訓也舍之則藏至順也九

河盈溢非一由所防帶甲百萬非一勇所抗今子責匹夫以清宇宙庸可以水旱而累堯湯乎懼煙炎之燬燬何光芒之敢揚哉且夫地將震而樞星直井無景則日陰食元首寬則望舒朏侯王肅則月側匿是以君子推微達著尋端見緒履霜如水踐露知暑時行則行時止則止消息盈沖取諸天紀利用遭泰可與處否樂天知命持神任已羣車方奔乎險路安能與之齊軌思危難而自豫故在賤而不耻方將騁馳乎典籍之崇塗休息

乎仁義之淵藪盤旋乎周孔之庭宇揖儒墨而與為友
舒之足以光四表收之則莫能知其所有若乃丁千載
之運應神靈之符閭闔闔乘天衢擁華蓋奉皇樞納玄
策于聖德宣太平于中區計合謀從己之圖也勲績不
立予之辜也龜鳳山翳霧靈不除踴躍草萊祇見其愚
不我知者將謂之迂修業思真棄此焉如靜以俟命不
數不渝百歲之後歸乎其居幸其獲稱天所誘也罕漫
而已非已咎也昔伯翳綜聲於鳥語菖盧辨音於鳴牛

董父受氏於豢龍奚仲供德於衡輅倭氏興政于巧工
造父登御于驊騮非子享土於善圉狼臆取右于禽囚
弓父畢精于筋角欽飛明勇於赴流壽王創基於格五
東方要幸於談優上官効力於執蓋弘羊據相于運籌
僕不能叅跡于若人故抱璞而優游於是公子俛首降
階忸怩而避胡老乃揚衡含笈援琴而歌歌曰

練予心兮浸太清滌穢濁兮存正靈和液暢兮神氣寧
情志泊兮心亭亭嗜欲息兮無由生踔宇宙而遺俗兮眇

翩翩而獨征

篆勢

唐張懷瓘書斷分
載作大篆小篆贊

字畫之始因于鳥跡蒼頡循聖作則制文體有六篆巧
妙入神或象龜文或比龍鱗紆體放尾長翅短身頡若
黍稷之垂穎蘊若虫蛇之焚緼揚波振擊龍躍鳥震延
頸脅翼勢欲凌雲或輕舉內投微本濃末若絕若連似
水露緣絲凝垂下端從者如懸衡者如編杪者邪趣不
方不圓若行若飛岐岐翾翾遠而望之若鴻鵠羣遊絡

繹遷延迫而視之湍際不可得見指揮不可勝原研桑
不能數其詰屈離婁不能覩其隙間般倅揖讓而辭巧
籀誦拱手而韜翰處篇籍之首目粲粲彬彬其可觀擣
華豔于紈素為學藝之範圍嘉文德之弘懿蘊作者之
莫刊思字體之俯仰舉大略而論旃

或象龜文二句書
斷小篆贊又作龜

文鍼列御比龍鱗為學藝
之範圍作為六藝之範先

隸勢

鳥跡之變乃惟佐隸蠲彼繁文崇此簡易厥用既行體

象有度與若星陣鬱若雲布其大徑尋細不容髮隨事
從宜靡有常制或穹窿恢廓或櫛比鍼列或砥繩平直
或蜿蜒繆戾或長邪角趣或規旋矩折修短相副異體
同勢奮華輕舉離而不絕纖波濃點錯落其間若鍾簾
設張庭燎飛烟嶄嵒崔嶮高下屬連似崇臺重宇層雲
冠山遠而望之若飛龍在天近而察之心亂目眩竒姿
譎誕不可勝原研桑所不能計宰賜所不能言何草莽
之足筭而斯文之未宣豈體大之難覩將秘奧之不傳

聊佇思而詳觀舉大略而論旃

上原陵記

謝承後漢書

建寧五年正月車駕上原陵蔡邕為司徒掾從公行到陵見其儀愾然謂同坐者曰聞古不墓祭朝廷有上陵之禮始為可損今見威儀察其本意乃知孝明皇帝至孝惻隱不可易舊或曰本意云何昔京師在長安時其禮不可盡得聞也光武即世始葬于此明帝嗣位踰年羣臣朝正感先帝不復聞見此禮乃師公卿百寮就園

陵而創焉尚書陞西陞為神坐天子事亡如事存之意
苟先帝有瓜葛之屬男女畢會王侯大夫郡國計吏各
向神坐而言庶幾先帝神魂聞之今者日月久遠後生
非時人但見其禮不知其哀以明帝聖孝之心親服三
年久在園陵初興此儀仰察几筵下顧羣臣悲切之心
必不可堪邕見太傅胡廣曰國家禮有煩而不可省者
不知先帝用心周密之至于此也廣曰然子宜載之以
示學者邕退而記焉

述行賦序

延熹二年秋霖雨逾月是時梁冀新誅而徐璜左悺五
侯擅貴于其處又起顯明苑于城西人徒凍餓不得其
命者甚衆白馬令李雲以直言死鴻臚陳君以救雲抵
罪璜以余能鼓琴白朝廷敕陳留郡守遣余到偃師病
不前得歸心憤此事遂託所過述而成賦

筆賦序

初學記○下
並集不載

昔蒼頡創業翰墨作用書契興焉夫制作上聖立憲者

莫先乎筆詳原其所由究察其成功鑠乎煥乎不可尚

矣

初學記○御覽邕傷故栗賦序人有折蔡氏祠前故栗者故作斯賦

連珠

北堂書抄

道為知者設馬為御者良賢為聖者用辨為知者通

廣連珠

太平書抄

臣聞目矐耳鳴近夫小戒也狐鳴犬嗥家人小妖也猶

忌慎動作封鎮書符以防其禍是故天地示異災變橫

起則人主恒恐懼而修政

又云叅絲之紋以絃琴緩張則撓急張則絕

九惟

此九惟之一

人惟困乏憂心殷殷天之生我星宿值貧六極之厄獨
遭斯勤居處浮漚無以自任冬日粟粟上下同雲無衣
無褐何以自溫六月徂暑炎赫來臻無絺無綌何以蔽
身無食不飽永離懽欣

古文苑

女訓

太平御覽

舅姑若命之鼓琴必正坐操琴而奏曲若問曲名則捨
琴興對曰某曲坐若近則琴聲必聞若遠左右必有贊

其言者凡鼓小曲五終則止大曲三終則止無數變曲
無多少尊者之聽未厭不敢早止若顧望視也則曲終
而後止亦無中曲而息也琴必常調尊者之前不更調
張私室若近舅姑則不敢鼓獨若絕遠聲音不聞鼓之
可也鼓琴之夜有姊妹之宴則可也

女誠

太平御覽

心猶首面也是以甚致飾焉面一旦不修則塵垢穢之
心一朝不思善則邪惡入之咸知飾其面不修其心惑

矣夫面之不飾愚者謂之醜心之不修賢者謂之惡愚者謂之醜猶可賢者謂之惡將何容焉故覽照拭面則思其心之潔也傅脂則思其心之和也加粉則思其心之鮮也澤髮則思其心之順也用櫛則思其心之理也立髻則思其心之正也撮髮則思其心之整也

禮女始行服纁纁絳也絳正色也紅紫不以為褻服緇綠不以為上服繒貴厚而色尚深為其堅紉也

勸學

藝文類聚

蟪無瓜牙輓弱不便穿穴洞地食塵飲泉

蔡邕畫像頌

東國宗敬邕不言名或稱蔡君充州陳留並圖畫形象而頌之曰

文同三閭孝齊參騫

蔡邕別傳



東漢文紀卷二十三